

每週經課朗誦經文(巴克禮漢羅/教羅)2014/02/16

共同經課 - 1

申命記三十五章十五節~二十節

15 看 ah, 我今 á 日有用活 kap 福氣, 死 kap 災厄, 排列 tī 你 ê 面前; 16 就是我今 á 日命令你疼耶和華你 ê 上帝, 行伊 ê 道路, 守伊 ê 誠命、律例、法度, hō 你 thang 活 teh, 加添人額, 耶和華你上帝就 beh tī 你所 beh 入去承接 ê 地賜福你。17 設使你 ê 心悖謬 m̄聽 thàn, koh 受誘惑, 去敬拜別 ê 上帝服事伊; 18 我今 á 日就明明 kā lín 講: lín 的確 beh 滅無; tī 你過約旦入去承接 ê 地, 你 ê 日子 boē 會久長。19 我今 á 日叫天叫地對 lín 做干證, 我用生死, 祝福咒詛, 排列 tī 你 ê 面前; 所以你 tiòh 揀活命, hō 你 kap 你 ê 後裔 lóng 會活 teh; 20 來疼耶和華你 ê 上帝, 聽伊 ê 話, 結聯 tī 伊; 因為伊是你 ê 活命, 你 ê 日子久長也在 tī 伊; hō 你 thang khiā 起 tī 耶和華對你 ê 列祖亞伯拉罕、以撒、雅各, chiù-choā 所 beh 賞賜 in ê 地。

共同經課 - 2

詩篇一百一十九篇一節~八節

1 所行完全, 遵 thàn 耶和華律法 ê, Chit 號人有福氣。2 遵守伊干證 ê 話, 專心 chhē 伊 ê, chit 號人有福氣。3 In 無做不義 ê 事; In 遵 thàn 伊 ê 道路。4 你 bat 將你教示 ê 話吩咐阮; 是 ài 阮慇懃遵守。5 願我 ê 趨向定 tiòh, 來守你 ê 律例。6 我對重你一切 ê 誠命, 就不致見笑。7 我學習你公義 ê 判斷, 就 beh 用正直 ê 心感謝你。8 我 beh 守你 ê 律例; 求你 m̄-thang 一盡放 sak 我。

共同經課 - 3

哥林多前書三章一節~九節

1 兄弟 ah, 我前 kap lín 講話, boē 會掠 lín 做屬神 ê 人, 是做屬肉體 ê 人, tiàm-tī 基督是做嬰 á ê。2 我 bat 用奶飼 lín, 無用米糧; 3 因為 lín 前 boē 堪得, 到 taⁿ iáu boē 會; 是 lín iáu thàn 肉體; lín 中間既然有怨妒相爭, kiám m̄ 是 thàn 肉體, 照人 ê 款來行 mah? 4 因為 chit-ê 講, 我屬保羅, hit-ê 講, 我屬亞波羅, án-ni lín kiám m̄ 是 thàn 人 ê 意思 mah? 5 亞波羅是甚麼? 保羅是甚麼? 是 lín 所 tùi in 來信 ê 差用, 照主所賞賜 tak 人 ê。6 我栽種, 亞波羅 ak 水, 獨獨上帝 hō 伊大叢。7 Án-ni-siⁿ 栽種 ê, ak 水 ê, lóng boē 算得賬; 只有 hō 伊大叢 ê 上帝 nā-tiāⁿ。8 栽種 ê kap ak 水 ê 是一樣; 但是 tak 人照家己 ê tiòh 磨 beh 得 tiòh 家己 ê 工錢。9 因為阮是上帝 ê 同 tiòh 磨 ê; lín 是上帝所作 ê 園, 上帝所起 ê 厝。

共同經課 - 4

馬太福音五章二十一節~三十七節

21 Lín bat 聽見有對古早人講, M̄-thang 害死人; 害死人 ê tiòh 受審判。22 總是我 kā lín 講, 見若受氣伊 ê 兄弟 ê, tiòh 受審判; 見若對伊 ê 兄弟講 Liáp-ka ê, tiòh 受公會辦; 見若講 Mô-lī ê, tiòh 受地獄 ê 火。23 所以你若 teh 獻你 ê 禮物 tī 祭壇, 也 tī hia 記得你 ê 兄弟有甚麼 hiáp-hiám 你; 24 tiòh tī hia 放下你 ê 禮物 tī 壇前, 事先去 kap 你 ê 兄弟和好, 然後來獻你 ê 禮物。25 你 iáu kap 你 ê 對敵 tī 路裡, tiòh 緊緊 kap 伊和, 驚了對敵交你 hō 審判官, 審判官交你 hō 衙役, 你就受關落監。26 我實在 kā 你講, 一絲一毫 bē 還, 你決斷 boē-oē 出 hia。27 Lín bat 聽見有話講, M̄-thang 行姦淫; 28 若是我 kā lín 講, 見若看見婦女, 來動起慾念 ê, 心內已經淫伊。29 設使你 ê chiàⁿ 目致到你犯罪, 就 tiòh iah hiat-kák; 寧可百體喪失一體, 免致你全身 hiat 落地獄。30 設使你 ê chiàⁿ 手致到你犯罪, 就 tiòh 斬 hiat-kák; 寧可百體喪失一體, 免致你全身去地獄。31 Koh 有話講, 人若 beh 離伊 ê bó, tiòh 用離書 hō 伊; 32 若是我 kā lín 講, 見若 m̄ 是為 tiòh 姦淫 ê 緣故來離伊 ê bó, 便是 hō 伊做有 im-hēng ê; 見若 choā 所離 ê, 亦是行姦淫。33 Koh Lín bat 聽見有對古早人講, M̄-thang 背 chiù-choā, 你所 chiù ê choā, tiòh 還 hō 主; 34 若是我 kā lín 講, 一概莫得 chiù-choā; 莫得 kí 天, 因為天是上帝 ê 座位; 35 莫得 kí 地, 因為地是伊 ê 腳踏; 莫得 kí 耶路撒冷, 因為是大人君 ê 城。36 亦莫得 kí 你 ê 頭殼來 chiù-choā, 因為一支頭毛, 你 boē hō 伊做烏做白。37 若是 lín ê 話 tiòh 講, 是, 就是; m̄ 是, 就 m̄ 是; chiah-ê 以外是 tùi hit-ê pháiⁿ-ê 出。